



REPUBLIKA E SHQIPËRISË
KOMISIONI QENDROR I ZGJEDHJEVE

Komisioneri Shtetëror i Zgjedhjeve

Data: 18.01. 2023

Nr: 1

Ora: 11.00

UDHËZIM

PËR

PËRCAKTIMIN E RREGULLAVE PËR DEPOZITIMIN DHE VERIFIKIMIN E DOKUMENTACIONIT TË KANDIDIMIT, AFATET PËR PUBLIKIMIN E LISTAVE TË KANDIDATËVE DHE MIRATIMIN E MODELEVE TË KANDIDIMIT PËR ZGJEDHJET PËR ORGANET E QEVERISJES VENDORE

Në mbështetje të neneve 19, pikat 1, shkronja “n”, dhe 2, 64, pika 2, shkronja “e”, 67, 68, 70, 71, 72, 73, dhe 92/2, të ligjit nr.10019, datë 29.12.2008, “Kodi Zgjedhor i Republikës së Shqipërisë”, të ndryshuar, të ligjit nr.138/2015, “Për garantimin e integritetit të personave që zgjidhen, emërohen ose ushtrojnë funksione publike”, dhe të vendimit të Kuvendit, nr.17/2016, “Për përcaktimin e rregullave të detajuara mbi zbatimin e ndalimeve të parashikuara në ligjin nr.138/2015”

UDHËZOJ:

Neni 1

Modelet e kandidimit

1. Komisioni Qendror i Zgjedhjeve udhëzon plotësimin e dokumentacionit të kandidimit për zgjedhjet për organet e qeverisjes vendore sipas modeleve:
 - a) Formular për mbledhjen e nënshkrimeve të zgjedhësve për mbështetje kandidati, Model KQZ-04-01;
 - b) Deklarata e angazhimit solemn e kryetarit të partisë politike, Model KQZ-04-02;
 - c) Deklaratë për hapje llogarie të posaçme bankare të partisë politike Model KQZ-04-03;
 - d) Kërkesë për regjistrimin e Komitetit Nismëtar, Model KQZ-04-04;
 - e) Kërkesë për regjistrimin e kandidatit të propozuar nga zgjedhësit, Model KQZ-04-05;
 - f) Kërkesë për regjistrimin e kandidatit për Kryetar Bashkie propozuar nga parti politike/koalicion, Model KQZ-04-06;
 - g) Kërkesë për regjistrimin e listës shumëmemërore për anëtarë të këshillit bashkiak propozuar nga parti politike/koalicion, Model KQZ-04-07;

Data: 18.01.2023 Nr: 1
Ora: 11.00



Për përcaktimin e rregullave për depozitimin dhe verifikimin e dokumentacionit të kandidimit, afatet për publikimin e listave të kandidatëve dhe miratimin e modeleve të kandidimit.

- h) Deklaratë e kandidatit për hapje llogarie bankare të posaçme, Model KQZ-04-08;
 - i) Deklaratë për pranimin e kandidimit, Model KQZ-04-09;
 - j) Jetëshkrimi i kandidatit, Model KQZ-04-10;
 - k) Procesverbal i dorëzimit të dokumentacionit të kandidimit Model KQZ-00-31.
2. Modelet e kandidimit përmbajnë pjesën sqaruese ku përcaktohet mënyra e plotësimit të tyre.
 3. Modelet e kandidimit pasqyrohen në shtojcën që i bashkëlidhet këtij udhëzimi.

Neni 2

Dorëzimi i dokumentacionit të kandidimit

1. Dokumentacioni i kandidimit për kandidatin për kryetar të njësisë së qeverisjes vendore dhe për kandidatët për këshillin vendor depozitohen në KZAZ-në që mbulon njësinë përkatëse të qeverisjes vendore.
2. Përjashtimisht nga pika 1 e këtij udhëzimi për bashkitë Shkodër, Lezhë, Durrës, Kamëz, Tiranë, Elbasan, Lushnjë, Fier, Berat, Korçë, Vlorë, dokumentacioni i kandidimit depozitohet në KQZ.

Neni 3

Regjistrimi i kandidatit për kryetar bashkie i propozuar nga partia politike ose koalicioni

1. Partia politike ose koalicioni që është regjistruar në KQZ si subjekt zgjedhor për zgjedhjet e organeve të qeverisjes vendore, depoziton sipas rastit në KQZ/KZAZ kërkesën për regjistrimin e kandidatit për kryetar të njësisë së qeverisjes vendore, jo më vonë se 50 ditë para datës së zgjedhjeve.
2. Partia politike ose koalicioni, për zgjedhjet e qeverisjes vendore, duhet të paraqesë, sipas rastit, në KQZ/KZAZ dokumentacionin e mëposhtëm:
 - a) Kërkesën për regjistrimin e kandidatit për Kryetar Bashkie të nënshkruar nga kryetari i partisë/koalicionit ose personi i autorizuar prej tyre, sipas Modelit KQZ-04-06;
 - b) Deklaratën e kandidatit për hapjen e llogarisë së posaçme bankare për dhurimin e fondeve jopublike, sipas pikës 3, të nenit 92/2, të Kodit Zgjedhor sipas Modelit KQZ-04-08;
 - c) Deklaratën për pranimin e kandidimit, ku të deklarohen të gjitha elementet e përcaktuara në shkronjat “b”, “c” e “ ” të nenit 72, të Kodit Zgjedhor sipas Modelit KQZ-04-09;
 - d) Autorizimin e Kryetarit të Partisë për nënshkrimin e dokumentit të kandidatit për Kryetar Bashkie. (nëse dokumenti nuk është nënshkruar nga kryetari i partisë sipas nenit 72, pika 3 e Kodit Zgjedhor).

- e) Sipas rastit, kopjen e deklaratës së dorëheqjes nga funksionet e përcaktuara në pikën 4, të nenit 63, të Kodit Zgjedhor depozituar dhe protokolluar pranë institucionit përkatës;
 - f) Vërtetimin e nënshkruar nga Kuvendi ose njësia përkatëse e qeverisjes vendore, ku vërtetohet zotërimi i mandatit, të paktën 6 (gjashtë) muaj para përfundimit të mandatit të Kuvendit ose organit të njesisë së qeverisjes vendore;
 - g) Formularin tip të nënshkruar nga zgjedhësit e zonës përkatëse që mbështesin kandidatin/partinë/koalicionin, në përputhje me nenet 68, 70 dhe 71, të Kodit Zgjedhor sipas Modelit KQZ-04-01. Formularit tip i bashkëlidhet fotokopja e dokumentit të identifikimit të vlefshëm, të nënshkruar nga çdo zgjedhës;
 - h) Jetëshkrimin e kandidatit Model KQZ-04-10;
 - i) Kopjen e dokumentit të identifikimit të kandidatit për Kryetar Bashkie;
 - j) Formularin e vetëdeklarimit të kandidatit për Kryetar Bashkie;
 - k) Procesverbalin e dorëzimit të dokumenteve sipas Modelit KQZ-00-31, në momentin e depozitimit të dokumenteve të kandidimit.
3. Kërkesa referuar në shkronjën “a”, të pikës 2, të këtij neni, nënshkruhet nga Kryetari i partisë udhëheqëse të koalicionit ose personi i autorizuar prej tij.

Neni 4

Regjistrimi i listës shumemërore të kandidatëve për anëtar të këshillit bashkiak të propozuar nga partia politike ose koalicioni

1. Partia politike ose koalicioni që është regjistruar në KQZ si subjekt zgjedhor për zgjedhjet e organeve të qeverisjes vendore, depoziton sipas rastit në KQZ/KZAZ kërkesën për regjistrimin e listës shumemërore për anëtarë të këshillit të njesisë së qeverisjes vendore jo më vonë se 50 ditë para datës së zgjedhjeve.
2. Partia politike ose koalicioni për regjistrimin e listës shumemërore duhet të paraqesin, sipas rastit, në KQZ/KZAZ, dokumentacionin e mëposhtëm:
 - a) Kërkesën për regjistrimin e listës shumemërore të kandidatëve për anëtarë të këshillit bashkiak të nënshkruar nga kryetari i partisë ose personi i autorizuar prej tij, sipas Modelit KQZ-04-07;
 - b) Deklaratën e secilit prej kandidatëve të listës shumemërore për hapjen e llogarisë të posaçme bankare për dhurimin e fondeve jopublike, sipas pikës 3, të nenit 92/2, të Kodit Zgjedhor të cilën e deklarojnë në momentin e regjistrimit të listës së kandidatëve, sipas Modelit KQZ-04-08;
 - c) Deklaratën e secilit prej kandidatëve të listës shumemërore për pranimin e kandidimit ku deklarohen të gjitha elementet e përcaktuara në shkronjat “b”, “c” e “d” të nenit 72, të Kodit Zgjedhor sipas Modelit KQZ-04-09;
 - d) Sipas rastit, kopjen e deklaratës së dorëheqjes nga funksionet e përcaktuara në pikën 4, të nenit 63, të Kodit Zgjedhor depozituar dhe protokolluar pranë institucionit përkatës;

- e) Vërtetimin e nënshkruar nga Kuvendi ose njësia përkatëse e qeverisjes vendore, ku vërtetohet zotërimi i mandatit, të paktën 6 (gjashtë) muaj para përfundimit të mandatit të Kuvendit ose organit të njësisë së qeverisjes vendore;
 - f) Formularin tip të nënshkruar nga zgjedhësit e zonës përkatëse që mbështesin kandidatin/partinë/koalicionin, në përputhje me nenet 68, 70 dhe 71, të Kodit Zgjedhor sipas modelit Model KQZ-04-01. Formularit tip i bashkëlidhet fotokopja e dokumentit të identifikimit të vlefshëm, e nënshkruar nga çdo zgjedhës;
 - g) Jetëshkrimin e kandidatëve të listës shumemërore sipas Modelit KQZ-04-10;
 - h) Kopjen e dokumentit të identifikimit të kandidatëve të listës shumemërore;
 - i) Formularin e vetëdeklarimit për secilin nga kandidatët e listës shumemërore;
 - j) Autorizimin e Kryetarit të Partisë për nënshkrimin e listës shumemërore (nëse lista nuk është nënshkruar nga kryetari i partisë sipas nenit 72, pika 3 e Kodit Zgjedhor);
 - k) Procesverbalin e dorëzimit të dokumenteve sipas Modelit KQZ-00-31, në momentin e depozitimit të dokumenteve të kandidimit.
3. Kërkesa referuar në shkronjën “a”, të pikës 2, të këtij neni, nënshkruhet nga Kryetari i partisë udhëheqëse të koalicionit ose personi i autorizuar prej tij.

Neni 5

Regjistrimi i kandidatit për kryetar bashkie i propozuar nga zgjedhësit

1. Komiteti Nismëtar, që është regjistruar në KQZ/KZAZ për zgjedhjet e organeve të qeverisjes vendore, për të mbështetur një kandidat të propozuar nga zgjedhësit, depoziton sipas rastit në KQZ/KZAZ kërkesën për regjistrimin e kandidatit për kryetar të njësisë së qeverisjes vendore jo më vonë se 50 ditë para datës së zgjedhjeve.
2. Komiteti Nismëtar për regjistrimin e kandidatit për kryetar bashkie duhet të paraqesi, sipas rastit, në KQZ/KZAZ, dokumentacionin e mëposhtëm:
 - a) Kërkesën e paraqitur nga Komiteti Nismëtar për të regjistruar kandidatin për kryetar bashkie, sipas Modelit KQZ-04-05;
 - b) Deklaratën e kandidatit për hapjen e llogarisë të posaçme bankare për dhurimin e fondeve jopublike, nëse planifikon të pranojë dhurime për fushatë, bazuar në pikën 3, të nenit 92/2, të Kodit Zgjedhor, sipas Modelit KQZ-04-08;
 - c) Deklaratën e pranimit të kandidimit ku të deklarohen të gjitha elementet e përcaktuara në shkronjat “b”, “c” e “ç”, të nenit 72, të Kodit Zgjedhor, sipas Modelit KQZ-04-09;
 - d) Deklaratën e kandidatit të propozuar nga zgjedhësit se nuk është pjesë e asnjë partie apo koalicioni dhe as të mbështesë haptazi apo në mënyrë të tërthortë, ndonjë subjekt apo kandidat tjetër, sipas Model KQZ-04-09;

- e) Sipas rastit, kopjen e deklaratës së dorëheqjes nga funksionet e përcaktuara në pikën 4, të nenit 63, të Kodit Zgjedhor depozituar dhe protokolluar pranë institucionit përkatës;
- f) Formularin tip me nënshkrimet e zgjedhësve, emrat e të cilëve janë të përfshirë në ekstraktin e përbërësve zgjedhorë , të zonës zgjedhore të përcaktuar në këtë formular në përputhje me nenet 68, 70 dhe 71, të Kodit Zgjedhor, sipas Modelit KQZ-04-01. Formularit tip i bashkëlidhet fotokopja e dokumentit të identifikimit të vlefshëm, e nënshkruar nga çdo zgjedhës
- g) Vërtetimin me shkrim, të nënshkruar nga Kuvendi apo njësia e qeverisjes vendore, ku vërtetohet zotërimi i mandatit të paktën 6 muajt e fundit, bazuar në nenin 70/4 të "Kodit Zgjedhor.
- h) Jetëshkrimin e kandidatit Model KQZ-04-10;
- i) Kopjen e dokumentit të identifikimit të kandidatit;
- j) Formularin e vetëdeklarimit të kandidatit;
- k) Procesverbalin e dorëzimit të dokumenteve, i cili plotësohet në momentin e depozitimit të dokumenteve të kandidimit, sipas Modelit KQZ-00-31.

Neni 6

Regjistrimi i kandidatit për anëtar të këshillit bashkiak të propozuar nga zgjedhësit

1. Komiteti Nismëtar, që është regjistruar në KQZ/KZAZ për zgjedhjet e organeve të qeverisjes vendore, për të mbështetur një kandidat të propozuar nga zgjedhësit, depoziton, sipas rastit, në KQZ/KZAZ kërkesën për regjistrimin e kandidatit për anëtar të këshillit të njësisë së qeverisjes vendore jo më vonë se 50 ditë para datës së zgjedhjeve.
2. Komiteti Nismëtar për regjistrimin e kandidatit për anëtarë të këshillit të qeverisjes vendore duhet të paraqesë, sipas rastit, në KQZ/KZAZ, dokumentacionin e mëposhtëm:
 - a. Kërkesën e paraqitur nga Komiteti Nismëtar për të regjistruar kandidatin për anëtar të këshillit të qeverisjes vendore, sipas Modelit KQZ-04-05;
 - b. Deklaratën e kandidatit për hapjen e llogarisë të posaçme bankare për dhurimin e fondeve jopublike, sipas pikës 3, të nenit 92/2, të Kodit Zgjedhor, sipas Modelit KQZ-04-08;
 - c. Deklaratën e pranimit të kandidimit ku të deklarohen të gjitha elementet e përcaktuara në shkronjat "b", "c" e "ç", të nenit 72, të Kodit Zgjedhor sipas Modelit KQZ-04-09;
 - d. Deklaratën e kandidatit për anëtar të këshillit të qeverisjes vendore të propozuar nga zgjedhësit se nuk është pjesë e asnjë partie apo koalicioni dhe as të mbështesë haptazi apo në mënyrë të tërthortë, ndonjë subjekt apo kandidat tjetër sipas Modelit KQZ-04-09;

- e. Sipas rastit, kopjen e deklaratës së dorëheqjes nga funksionet e përcaktuara në pikën 4, të nenit 63, të Kodit Zgjedhor depozituar dhe protokolluar pranë institucionit përkatës;
- f. Formularin me nënshkrimet e zgjedhësve, emrat e të cilëve janë të përfshirë në ekstraktin e përbërësve zgjedhorë të zonës zgjedhore të përcaktuar në këtë formular në përputhje me nenet 68, 70 dhe 71, të Kodit Zgjedhor, sipas Modelit KQZ-04-01. Formularit tip i bashkëlidhet fotokopja e dokumentit të identifikimit të vlefshëm, e nënshkruar nga çdo zgjedhës.
- g. Vërtetimin me shkrim, të nënshkruar nga Kuvendi apo njësia e qeverisjes vendore, ku vërtetohet zotërimi i mandatit të paktën 6 muajt e fundit në referim të nenit 70/4 të Kodit Zgjedhor;
- h. Jetëshkrimin e kandidatit sipas Modelit KQZ-04-10;
- i. Kopjen e dokumentit të identifikimit të kandidatit;
- j. Formularin e vetëdeklarimit të kandidatit;
- k. Procesverbalin e dorëzimit të dokumenteve, i cili plotësohet në momentin e depozitimit të dokumenteve të kandidimit sipas Modelit KQZ-00-31.

Neni 7

Verifikimi i dokumentacionit të kandidimit të depozituar në KZAZ

1. KZAZ kryen verifikimin e dokumentacionit të kandidimit në lidhje me përputhshmërinë e tij me kërkesat e neneve 67, 68 dhe 72, të Kodit Zgjedhor, duke ndjekur këtë radhë veprimi:
 - a) Verifikon nëse subjekti parti politike/koalicion është regjistruar si subjekt zgjedhor;
 - b) Verifikon nëse Komiteti Nismëtar që propozon një kandidat është regjistruar;
 - c) Verifikon plotësimin e kushteve/kritereve të përcaktuara në dispozitat e neneve 67 deri 72, të Kodit Zgjedhor, përfshirë edhe zbatimin e kuotës gjinore;
 - d) Verifikon plotësinë e dokumenteve të kandidimit dhe të nënshkrimeve;
 - e) Në rast se konstatohet mosplotësimi i kushteve/kritereve të përcaktuara në Kodin Zgjedhor, apo mungojnë dokumente, KZAZ-ja i kërkon menjëherë subjektit zgjedhor të bëjë plotësimin e dokumenteve.
2. KZAZ dorëzon në KQZ një kopje të listës së kandidatëve, së bashku me formularët e vetëdeklarimit për secilin kandidat jo më vonë se 48 orë nga marrja në dorëzim.
3. KZAZ përveç verifikimit të përcaktuar në pikën 1, të këtij neni, kryen dhe verifikimin e listës së zgjedhësve që mbështesin kandidatët e partisë/ve politike, koalicionit/eve kandidatit e propozuar nga zgjedhësit, të cilët nuk zotërojnë mandat në Kuvend ose zotërojnë së bashku më pak mandate se numri i partive pjesëtare të koalicionit.
4. KZAZ-ja depoziton një kopje të listës për kandidatët për kryetarë dhe këshillat e njësisë së qeverisjes vendore në KQZ, jo më vonë se 24 orë nga miratimi përfundimtar i listës.

Neni 8

Verifikimi i dokumentacionit të kandidimit të depozituar në KQZ

1. KQZ kryen verifikimin e dokumentacionit të kandidimit në lidhje me përputhshmërinë e tij me kërkesat e neneve 67, 68 dhe 72, të Kodit Zgjedhor, duke ndjekur këtë radhë veprimi:
 - a) Verifikon nëse subjekti parti politike/koalicion është regjistruar si subjekt zgjedhor;
 - b) Verifikon nëse Komiteti Nismëtar që propozon një kandidat është regjistruar;
 - c) Verifikon plotësimin e kushteve/kritereve të përcaktuara në dispozitat e neneve 67 deri 72, të Kodit Zgjedhor, përfshirë edhe zbatimin e kuotës gjinore;
 - d) Verifikon plotësinë e dokumenteve të kandidimit dhe të nënshkrimeve;
 - e) Në rast se konstatohet mosplotësimi i kushteve/kritereve të përcaktuara në Kodin Zgjedhor, apo mungojnë dokumente, administrata i kërkon menjëherë subjektit zgjedhor të bëjë plotësimin e dokumenteve.
2. Komisioneri Shtetëror i Zgjedhjeve miraton ose refuzon listën e kandidatëve për zgjedhjet e qeverisjes vendore.
3. KQZ përveç verifikimit të përcaktuar në pikën 1, të këtij neni, kryen dhe verifikimin e listës së zgjedhësve që mbështesin listat e kandidatëve të partisë/ve politike apo koalicionit/eve të cilat nuk zotërojnë mandat në Kuvend ose zotërojnë së bashku më pak mandate se numri i partive pjesëtare të koalicionit.

Neni 9

Verifikimi i nënshkrimeve mbështetëse për kandidatët

1. KQZ/KZAZ-ja cakton një seancë publike për verifikimin e nënshkrimeve në të cilën marrin pjesë përfaqësuesit e subjektit zgjedhor ose komitetit nismëtar, dhe/ose përfaqësuesit e subjekteve të tjera zgjedhore.
2. Në datën dhe orën e përcaktuar nga KQZ/ KZAZ-ja për zhvillimin e seancës, administrata e KQZ-së/KZAZ-së disponon një kopje të formularit tip të plotësuar nga nënshkrimet mbështetëse.
3. Administrata e KQZ-së/KZAZ-së përzgjedh në mënyrë rastësore 5% të zgjedhësve nga lista e zgjedhësve që mbështesin subjektin zgjedhor përkatës të kopjes së formularit tip të nënshkrimeve.
4. Administrata e KQZ-së/KZAZ-së verifikon nënshkrimin e kandidatëve duke përcaktuar nëse nënshkruesit janë zgjedhës me vendbanim në zonat zgjedhore përkatëse në momentin e depozitimit.
5. Numri i nënshkrimeve të rregullta pjesëtohet me numrin që përfaqëson 5% të të gjitha nënshkrimeve të paraqitura. Numri që del nga ky pjesëtim shumëzohet me numrin e nënshkrimeve të paraqitura. Rezultati që del nga këto veprime përfaqëson numrin e nënshkrimeve të rregullta në listën e paraqitur.

6. Lista pranohet kur numri i nënshkrimeve të rregullta është të paktën sa numri minimal i kërkuar për nënshkrimet, sipas përcaktimeve në Kodin Zgjedhor.

Neni 10

Dorëzimi i formularit të vetëdeklarimit

1. Formularët e vetëdeklarimit për kandidatët për zgjedhjet e organeve të qeverisjes vendore, të propozuar nga partitë politike/koalicioni/komiteti nismëtar depozitohen në KQZ për bashkitë e përcaktuara në nenin 2 pika 2 e këtij Udhëzimi dhe në KZAZ që mbulon njësinë përkatëse të qeverisjes vendore.
2. Në rastet kur depozitimi i dokumentacionit të kandidimit dhe formularëve të vetëdeklarimit bëhet në KZAZ, lista e kandidatëve, së bashku me formularët e vetëdeklarimit për secilin kandidat përcillen në KQZ menjëherë por jo më vonë se 48 orë nga dorëzimi i tyre.

Neni 11

Verifikimi i formularit të vetëdeklarimit

1. Administrata e KQZ-së verifikon *prima facie* të dhënat në formularin e vetëdeklarimit të kandidatëve, sipas procedurave të përcaktuara në ligjin nr.138/2015 dhe vendimin e Kuvendit nr.17/2016.
2. Administrata e KQZ-së, si rregull, brenda 72 orëve nga dorëzimi i formularëve të vetëdeklarimit, evidenton rastet e refuzimit apo të mosparaqitjes së formularit të vetëdeklarimit. Refuzimi për të dorëzuar formularin e vetëdeklarimit ose mosparaqitja e formularit të vetëdeklarimit përbën shkak për refuzimin e regjistrimit të kandidatit në zgjedhje nga Komisioneri Shtetëror i Zgjedhjeve.
3. Në varësi të rezultatit të verifikimit të formularëve të vetëdeklarimit, administrata i paraqet për miratim Komisionerit Shtetëror të Zgjedhjeve, projektaktin përkatës, sipas përcaktimeve në nenin 10, të ligjit nr.138/2015.
4. Vendimi për refuzimin e regjistrimit të kandidatit nga Komisioneri Shtetëror i Zgjedhjeve i njoftohet, menjëherë, subjektit zgjedhor, ose kandidatit të propozuar nga zgjedhësit. Në zgjedhjet për organet e qeverisjes vendore vendimi për refuzimin e regjistrimit të kandidatit apo vendimi për vazhdimin e procedurave për regjistrimin e kandidatëve i njoftohet menjëherë KZAZ-së që mbulon njësinë e qeverisjes vendore.
5. Vendimi i Komisionerit Shtetëror të Zgjedhjeve për refuzimin e regjistrimit përmban dhe sqarimin për të drejtën e subjektit për zëvendësimin e kandidaturës, jo më vonë se 42 (dyzet e dy) ditë para datës së zgjedhjeve.

Neni 12

Kthimi për plotësim dhe miratimi i dokumentacionit zgjedhor

1. KQZ-ja ose, sipas rastit, KZAZ-ja verifikon rregullsinë e dokumentacionit të kandidimit dhe, nëse vëren parregullsi apo mospërbushje të kërkesave të Kodit Zgjedhor ia kthen ato subjekteve zgjedhore për korrigjim, jo më vonë se 45 (dyzet e pesë) ditë përpara datës së zgjedhjeve.
2. Dokumentacioni i korrigjuar depozitohet jo më vonë se 42 (dyzet e dy) ditë përpara datës së zgjedhjeve. Vendimi për miratimin ose refuzimin e dokumentacionit përfundimtar merret brenda 48 orëve nga depozitimi i tyre.
3. Administrata e KQZ-së/KZAZ-së, si rregull, jo më vonë se 24 orë nga ridepozitimi, verifikon dokumentacionin e plotësuar. Komisioneri Shtetëror i Zgjedhjeve/KZAZ-ja vendos për miratimin ose refuzimin e dokumentacionit të kandidimit, jo më vonë se 24 orë.

Neni 13

Vendosja e sanksioneve

Mospërbushja nga subjekti zgjedhor i detyrimit të parashikuar në pikën 6 të nenit 67 të Kodit Zgjedhor, sipas të cilit, për zgjedhjet për këshillat bashkiakë, një në çdo dy emra të njëpasnjëshëm në renditjen e listës shumëmemërore të kandidatëve duhet ti përkasë së njëjtës gjini, passjell refuzimin e regjistrimit të listës.

Neni 14

Afatet për publikimin e listës së kandidatëve

1. Pas mbarimit të afatit të ankimimeve në Kolegjin Zgjedhor, KQZ-ja publikon listën e plotë të kandidatëve në faqen e saj zyrtare në internet.
2. Një kopje e listës për çdo zonë zgjedhore i dërgohet Prefektit, Këshillit të Qarkut dhe KZAZ-ve. Prefekti dhe Këshilli i Qarkut e publikojnë listën e kandidatëve të zonës zgjedhore në mediat vendore që kanë mbulimin më të gjerë me sinjal në qark si dhe e shpallin në vende publike në zonën e tyre. KZAZ-të përkatëse, menjëherë pas marrjes së listës shumëmemërore nga KQZ-ja, i afishojnë në hyrjen e selisë së tyre.

Neni 15

Dispozita të fundit

1. Udhëzimi nr. 1, datë 23.12.2020, i Komisionerit Shtetëror të Zgjedhjeve, "Për përcaktimin e rregullave për depozitimin dhe verifikimin e dokumentacionit të kandidimit dhe afatet për publikimin e listave të kandidatëve" shfuqizohet.

2. Ky udhëzim hyn në fuqi menjëherë dhe publikohet në faqen elektronike zyrtare të Komisionit Qendror të Zgjedhjeve.

Komisioneri Shtetëror i Zgjedhjeve

Ilirjan CELIBASHI